

LISTOVI GRAČANIČKOG KALENDARA OD 27. 11. 2012. DO 23. 4. 2013.

Dr. sc. Omer Hamzić



10. 12. 2012.

DRUGA SJEDNICA OPĆINSKOG VIJEĆA: REBALANS
OPĆINSKOG BUDŽETA ZA 2012. I NACRT ZA 2013.–U ZNAKU
PODBAČAJA, ODNOSNO UMANJENJA U PROSJEKU OD 10%

Planirani prihodi po Rebalansu iznose 12.761.000 što predstavlja umanjenje u odnosu na ranije usvojeni budžet za 2.712.000 KM. Podbačaj se, uglavnom, odnosi na neporezne prihode, odnosno grantovska i druga sredstva za kapitalne izdatke koji su planirani u iznosu od 5.228.600 KM, a ostvareni sa umanjenjem od 2.520.400 KM. Nije došlo do realizacije kredita Evropske investicione banke za projekte vodosnabdijevanja na općini, nisu obezbijedena planirana sredstva za toplifikaciju u iznosu od milion KM (iz Fonda za okoliš Federacije BiH), nisu okončane neke procedure za još nekoliko krupnijih projekata itd. Obim Budžeta za 2013. godinu (kako je predviđeno u Nacrtu) planiran je u iznosu od 11.505.000 KM., što je manje za oko 1,2 miliona KM u odnosu na rebalansirani Budžet za 2012. godinu.

15. 12. 2012.

RENOVIRANA STARA ČESMA NA ČIRIŠ-MAHALI U
GRAČANICI – VRIJEDNA DONACIJA BRAČNOG PARA
TAHIROVIĆ – NERMINA I SABINE

Kao i mnoge druge stare bosanske čaršije, i Gračanicu su nekada krasile mahal-ske česme i uređena izvorišta, sa kojih se stanovništvo snabdijevalo vodom, oko kojih se u stara vremena sijelilo, ašikovalo, veselilo. Uglavnom su građene i održavane sredstvima raznih dobrotvora i vakifa i bile na brizi mještana ili vakufa. Jedna od takvih bila je i mahalska česma na Čirišu, na raskrsnici kod stare Čiriške džamije. Kao i kod drugih sličnih objekata i na ovoj česmi vrijeme je učinilo svoje. Nekadašnja mahal-ska ljepotica vremenom je izgubila svoj prvobitni sjaj, a u posljednje vrijeme bila i poprilično zapuštena... Ali na inicijativu bračnog para Tahirović–Nermina i Sabine–koji su obezbijedili i novčana sredstva, te uz odgovarajuću podršku mještana, ove jeseni pristupilo se temeljnoj rekonstrukciji i uređenju tog izvorišta. Urađen je i osiguran kontinuiran dotok vode, ugrađen prečistač, uređen prilaz, postavljena klupa za odmor, kameni potporni zidovi. Radi autentičnosti, na renoviranoj česmi ostavljeno je i ugrađeno staro kameno korito, koje je služilo nekada za pranje veša, a sada će upotpuniti izgled česme i podsjećati na stara vremena. Povodom završetka rekonstrukcije česme, mještani su organizovali čajanku i mahal-sku kahvu „na licu mjesta“, uz koju su se družili zajedno sa svojim gostima i donatorima. Ima još dosta zapuštenih starih izvorišta i česmi na području Gračanice, ali je malo vakifa poput bračnog para Tahirovići.

16. 12. 2012.

SAID KARALIĆ, VLASNIK FIRME „KOVAN“ U GRAČANICI „NAJMENADŽER GODINE“ (U KONKURENCIJI „VELIKI BIZNIS“)

Ovo visoko priznanje dodijelila mu je nezavisna Agencija za izbor najmenadžera za 2012. godinu. Priznanje je to i njego-

voj firmi (osnovana 1996.), koja zapošljava blizu 150 radnika i preko 50% svoje proizvodnje izvozi na strano tržište. Kupci u više zemalja zapadne Evrope, odavno su prepoznali kvalitet eko-kotlova i kamina na pelet pod znakom „Kovan“ Gračanicu.

26. 12 2012.

IZBOR SPORTISTE GODINE – 2012.–

ZA OPĆINU GRAČANICA: NAJBOLJA

SPORTISTKINJA EMINA JUKAN – ŽENSKI

ODBOJKAŠKI KLUB (ŽOK), NAJBOLJI

SPORTISTA AMIR MULAHALILOVIĆ, GOLMAN

RK „GRAČANICA“.

Ekipne nagrade pripale su ŽOK-u „Gračanicu“ kao *najboljem ženskom sportskom kolektivu*, dok je ista nagrada (*najbolji muški sportski kolektiv*) u muškoj konkurenciji pripala nogometašima „Bratstva“. *Najuspješniji trener* je Jasmin Mrkonja iz RK „Gračanicu“, a *najbolji sportski radnik* dolazi iz NK „Bratstvo“, a to je Nesib Okić. *Posebno priznanje za dugogodišnje aktivno bavljenje sportom* dobio je Zaim Nurkić. U omladinskim kategorijama proglašeni su najbolji pioniri, kadeti i juniori. U *juniorskoj kategoriji* nagrade su osvojili Amela Kadić, članica ŽOK-a „Gračanicu“ i Admir Ahmetašević golman RK „Gračanicu“. U *kadetskoj konkurenciji* nagrade su dobili Hanifa Hasić, članica Karate kluba „Gračanicu“ i Nadir Mešetović, član Košarkaškog kluba „Gračanicu“ *Najbolji pioniri* su Emina Čurić, polaznica Škole rukometa „Poletarac“ i Samir Šišić, član pionirske selekcije NK „Bratstvo“. Dodijeljena su i *dva posthumna priznanja*: Osmanu Hasanbegoviću i Taksimu Šuši-Taksi. Nagrade su primili članovi njihovih porodica. Nagradu za *najuspješnijeg nastavnika tjelesnog odgoja* sasvim je zaslužen dobio Sanel Zaketović iz OŠ Džakule koja je ponijela i *nagradu*

za najuspješniju osnovnu školu na području naše općine. Mješovita srednja škola Gračanica dobila je nagradu kao najuspješnija srednja škola. (Radio Gračanica)

28. 12. 2012.

TREĆA SJEDNICA OPĆINSKOG VIJEĆA:

USVOJEN BUDŽET I PROGRAM RADA

OPĆINSKOG NAČELNIKA ZA 2013. GODINU

Budžet iznosi 11.287.000 KM, što je u odnosu na nacrt manje za 218.000 KM, jer su smanjeni grantovi od viših nivoa vlasti (manja odobrena sredstva za stambeno zbrinjavanje Roma i ekologiju). Budžet čine: očekivani višak prihoda na izdacima prethodne godine - 190.000 KM, prihodi-9.937.000 KM, primici-1.160.000 KM, izdaci-10.589.000 KM i otplate-698.000 KM. Budžet je usvojen sa 18 glasova "za", 11 "protiv" i 1 "suzdržan". Budžet nisu podržali vijećnici SDA. Usvojen je i Program rada Općinskog načelnika za 2013. godinu, uglavnom bez diskusije, te nekoliko odluka, međ kojima i: Odluka o izborima za vijeća mjesnih zajednica na općini Gračanica, Odluka o imenovanju općinskih komisija (stalna radna tijela), te Informacija o provođenju mjera zaštite od neeksplozivnih ubojnih sredstava na području općine Gračanica u 2012. godini.

7. 1. 2013.

POKRIVENA FISKULTURNA DVORANA

NA BAZENU U GRAČANICI – TAKOZVANI

POSLOVNO-KULTURNI I SPORTSKI CENTAR (PKSC)

Bio je to jako ambiciozan i zamašan projekat, koji je lokalna SDA počela još daleke 1997. godine pod nazivom Poslovno-kulturni i sportski centar (PKSC), po dimenzijama gotovo ravan tuzlanskom „Mejdanu“ i još nekim velikim sportskim centrima u zemlji. Centralni dio objekta svakako je

sportska dvorana sa oko 4 hiljade sjedišta i dimenzijama koje zadovoljavaju najstrožije sportske standarde. Planirano je da dvoranu u prvom redu koriste đaci gračaničkih srednjih škola za nastavu fizičkoj odgoja, ali je projektovana i za potrebe dvoranskih sportova i sportskih klubova u gradu. Bez zaokružene konstrukcije finansiranja, bez jasno izdiferencirane namjene ostalih prostora i bez jasnog definisanja vlasničkih odnosa-nakon temeljenja objekta i postavljanja betonskih konstrukcija i zidova, projekat je brzo „zaribao“, a u godinama krize, pokazao se kao megalomanski zahvat, koji Gračanica nije mogla iznijeti. U međuvremenu, kad je SDP „otjerao“ SDA sa lokalne vlasti, izgrađena je sportska sala „Luke“ za potrebe grada i gradskog sporta, dok su đaci gračaničkih srednjih škola i njihove „muke“ sa fizičkim odgojem u maloj Sali „Partizana“, koju su koristili još njihovi djeđovi gotovo potpuno zaboravljeni. U isto vrijeme betonska grdosija na Bazenu bila je izložena propadanju i postala ruglo grada.

Tokom prošle i prethodne godine, zbog pritiska javnosti i potreba gračaničkih srednjih škola, Općinski načelnik Nusret Helić, sa svojom ekipom pokrenuo je aktivnosti na preprojektovanju objekta (na neke realnije dimenzije) i obezbijedio sredstva za njegovo pokrivanje kako bi se spriječilo dalje propadanje već izgrađenog. Izvršena je kontrola projektne dokumentacije koja je rađena prije 15 godina. Kako je u međuvremenu došlo do promjene zakonskih propisa, izvršeno je preprojektovanje čelične krovne konstrukcije u skladu sa lokalnim i evropskim standardima. Osim sportske dvorane, u sklopu kompleksa nalaziti će se i poslovni prostori. Projektom je također predviđena izgradnja vanjskih igrališta za

mali nogomet, teniski i košarkaški teren. Predviđeno je da bude u funkciji održavanja i sajamskih manifestacija.

Za pokrivanje objekta Vlada Tuzlanskog kantona osigurala je 400.000, a općina Gračanica oko 600.000 KM. Kao investitor projekta, Općina je polovinom prošle godine raspisala tender za izbor izvođača radova, a posao je dobila firma „Sagra“ d.o.o. Gračanica, koja je uspjela završiti ugovorene radove u predviđenom roku i prema propisanim standardima.

Tako je PKSC „Bazen“ u Gračanici konačno dobio „krov nad glavom“. Ostalo je još dosta posla – na instalacijama i zatvaranju objekta, pa tek onda na osposobljavanju svih ostalih sadržaja. Iako predstavnici lokalne vlasti, nakon završetka krova, „siju optimizam“ (da će objekat profunkcionisati iduće godine), realna je činjenica da će biti jako teško, u uslovima krize namaknuti potrebna sredstva, čiju konačnu cifru niko i ne spominje, kao što ne spominje ni neriješene vlasničke odnose i konačan pravni status tog objekta.

25. 1. 2013.

UMRO REUF SOKOLOVIĆ, UTEMELJITELJ PERADARSKOG KOMPLEKSA I PRVI PREDSJEDNIK GRAČANIČKE RATNE VLADE

Rođen je 1943. godine u Gračanici, istakao se u političkom i privrednom životu predratne Gračanice („Elektro distribucija“, „Trgoproduct“, „Kokaproduct“). Prvi je začetnik i realizator ideje o zasnivanju i razvoju peradarstva kao potpuno nove grane poljoprivrede na području gračaničke općine. Vjerovao je i borio se za razvoj tog resursa, u okviru firme „Kokaproduct“ (kao nosioca razvoja) koja je, nakon privatizacije i u novim uslovima privređivanja, zapala u ogromne teškoće i neposredno

prije smrti svog osnivača dospjela u stečaj. Reuf Sokolović ušao je u historiju Gračanice kao prvi predsjednik ranog izvršnog odbora (1992. – 1993.) i jedan od najistaknutijih organizatora otpora i odbrane ovoga kraja.

27. 1. 2013.

IZBORI ZA VIJEĆA MJESNIH ZAJEDNICA: NA ZBOROVIMA GRAĐANA „DUGOG TRAJANJA“ – REALNA POTREBA MJESNE SAMOUPRAVE ILI NOVOTARIJA DEMOKRATIJE?

U pripremnoj fazi Izborna komisija za provođenje izbora u mjesnim zajednicama u saradnji sa Centralnom izbornom komisijom BiH, kompletirala je biračke spiskove za svaku mjesnu zajednicu, prikupila prijedloge političkih subjekata i sačinila kandidatske liste, te pripremila glasačke listiće kao i ostale prateće biračke materijale. Formirane su i odgovarajuće radne grupe zadužene za sprovođenje izbora na terenu. Kako je općinskim statutom predviđeno, izbori su regularni, ako zboru građana prisustvuje, odnosno glasa najmanje 5% građana s pravom glasa u okviru jedne mjesne zajednice. U protivnom, izbori za tu mjesnu zajednicu ponavljaju se „za 15 dana“. Ovakav princip biranja članova vijeća mjesnih zajednica propisan je Statutom Općine Gračanica i prvi put se pokušava primijeniti u praksi. Zborovi građana u svim mjesnim zajednicama zakazani su za 14.00 sati. Kao i na „pravim“ izborima građani s pravom glasa imali su priliku da tajnim glasanjem daju podršku ponuđenim kandidatima, ali „u okviru samo jednog političkog subjekta“ koji učestvuje u lokalnoj vlasti (Općinskom vijeću). U 23 mjesne zajednice na području općine, na glasanje je izašlo 2.618 birača. Najveća izlaznost zabilježena je u najmanjim mjesnim zajednicama: Lendići 35%,

Buk 31,8% i Gornja Lohinja 24,6%, a najslabija u najvećim: Gračanica 2,63% i Lukavica 3,85%, gdje će izbori biti ponovljeni za 15 dana. Rezultate ovih izbora potvrđuje općinsko vijeće, a praktičnu učinkovitost ove demokratske novotarije–vrijeme.

31. 1. 2013.

ČETVRTA SJEDNICA OPĆINSKOG VIJEĆA: PROGLAŠENI REZULTATI GLASANJA ZA MJESNU SAMOUPRAVU, USVOJEN IZVJEŠTAJ O RADU OPĆINSKOG NAČELNIKA ZA 2012., 11 VIJEĆNIKA SDA NIJE PODRŽALO IZVJEŠTAJ...

Tokom rasprave o rezultatima izbora, a prije usvajanja Odluke o *proglašenju rezultata izbora za vijeća mjesnih zajednica na području općine Gračanica*, najavljene su izmjene općinskog statute u “segmentu” mjesne samouprave, a moglo se čuti da su u proceduri i izmjene zakona o lokalnoj samoupravi.

Obrazlažući *Izveštaj o radu i realizaciji Programa rada Općinskog načelnika za 2012. godinu*, Općinski načelnik Nusret Helić je ocijenio da je prošla godina, bez obzira na sve ekonomske teškoće, smanjene prihode i druge probleme, bila uspješna i da su planirane aktivnosti, gotovo u cijelosti izvršene. U tom smislu spomenuo je sljedeće uspješno završene projekte: pokrivena je sportska dvorana na Bazenu, završena dionica regionalnog puta do Bolnice, završen veći dio radova na mostu kod Šumarije, asfaltirane tri ključne saobraćajnice u gradu (Lipa, Hajdarevac i ul. Bosanskih kraljeva), asfaltirana dionica puta Javor–Lendići, putevi u Gornjoj Orahovici, Babićima, Donjoj Orahovici, Prijekom Brdu, Lukavici i Doborovcima, završeni bazeni za vodu u Donjoj Lohinji i Vranovićima, pronađene nove količine vode u

Donjoj Orahovici, završena škola u Pribovi i Doborovcima, nastavljena regulacija korita rijeke Sokoluše. Uspješno je organizovan i treći sajam poduzetništva „Grapoexpo“, obrađeno blizu 500 rješenja za poticaje za poljoprivredne proizvođače kojim je odobreno 850.000 KM, realizovani poticaji iz općinskog budžeta za pčelare, plastenike i dijelove za poljoprivredne mašine, podignuta efikasnost organa uprave i javnog sektora, nastavljeno deminiranje prioriternih lokacija i saniranje prioriternih klizišta. Obezbijedena su budžetska sredstva za finansiranje sporta, programe nevladinog sektora i drugih korisnika budžeta, nastavljena dobra saradnja sa bratskim gradovima (spomenut je i novi bratimljeni grad Laterina iz Italije). Ostvarena dobra komunikacija sa međunarodnim organizacijama, nevladinim sektorom i građanima. Općinski načelnik je naglasio da je i pored svih teškoća izvještajna godina završena bez budžetskog deficita. Naglasio je da je uspješnom realiziranju pomenutih projekata uveliko doprinijela podrška saradnika i Općinskog vijeća.... I pored vidljivih rezultata, ovaj izvještaj nije jednoglasno usvojen. Izostala je podrška vijećnika SDA.

U nastavku ove sjednice usvojen je *Plan zaštite od požara na području općine Gračanica, Informacija o stanju bezbjednosti na području Policijske stanice Gračanica u 2012. godini, Informacija o implementaciji strategije za mlade općine Gračanica 2010-2012, Informacija o prostornom planu općine Gračanica, te Informacija o upravnom rješavanju predmeta u službama za upravu Općine Gračanica u 2012. godini.*

4. 2. 2013.

NOVE KOLIČINE PITKE VODE U GORNJOJ ORAHOVICI

Riječ je o trećoj i najznačajnijoj bušotini koja će u narednih 30 godina lokalno stanovništvo snabdijevati dovoljnim količinama vode. Bušotina je dubine 60 m, a daje oko 7,5 litara vode u sekundi. Sredstva od 17.000 KM koja su do sada uložena u projekat obezbijedila je MZ Gornja Orahovica. To je u svom kratkom obraćaju na skromnoj svečanosti povodom ove radne pobjede potvrdio i Vehid Osmanović, predsjednik mjesne zajednicu Gornja Orahovica i Vijećnik Općinskog vijeća Gračanica: "Nakon početka izgradnje vodovoda 2007. godine, projektnim zadatkom je definisano da Gornja Orahovica u narednih 30 godina treba imati 8 litara vode u sekundi. Dosađanjim kapacitetima obezbijedili smo 4,2 litra a kao što vidite, sa ovom izdašnom bušotinom imamo potrebnu količinu, što je preduslov za izgradnju kvalitetne hidrantske mreže", (BKC)

27. 2. 2013.

**PETA SJEDNICA OPĆINSKOG VIJEĆA:
TIJESNOM VEĆINOM SA 17 GLASOVA
USVOJENA ODLUKA O OBJAVLJIVANJU
JAVNOG OGLASA ZA IMENOVANJE ČLANOVA
OPĆINSKE IZBORNE KOMISIJE GRAČANICA,
DOK SU SVE OSTALE (MNOGO VAŽNIJE),
PROŠLE TAKOREĆI BEZ DISKUSIJE**

...kao npr. Odluka o proglašenju rezultata izbora za vijeća mjesnih zajednica Gračanica i Lukavica, Odluka o organizovanju i funkcionisanju zaštite od požara i vatrogastva na području općine Gračanica, Odluka o određivanju matičnih područja za vođenje matičnih knjiga na području općine Gračanica i Odluka o podizanju spomen-obilježja u MZ Gračanica, Odluka o promjeni statusa nepokretnosti, Akcioni plan jačanja socijalne zaštite i inkluzije djece i odraslih u općini Gračanica za

2013-2014. godinu, te Informacija o stanju zaštite od požara i vatrogastva na području općine Gračanica u 2012. godini. Usvojena je i Informacija o realizaciji odluke o stipendiranju učenika i studenata u školskoj 2012/2013. godini, uz zaključak da stipendiju dobiju svi učenici i studenti koji imaju isti broj bodova kao i posljednji kandidat u okviru utvrđenog broja stipendija. Otvorena je i javna rasprava o Nacrtu zakona o izmjenama i dopunama Zakona o prostornom uređenju i građenju i Nacrtu zakona o izmjenama i dopunama Zakona o cestovnom prijevozu na području Tuzlanskog kantona. (Pres općine Gračanica)

12. 3. 2012.

**TEMATSKA SJEDNICA OPĆINSKOG VIJEĆA
GRAČANICA: PRIHVAĆENI PLANovi UPISA
U PRVE RAZREDE SREDNJIH ŠKOLA
NA OPĆINI GRAČANICA ZA ŠKOLSKU
2013/2014. GODINU,**

Prema ovim planovima, u prvi razred Gimnazije „Dr. Mustafa Kamarić“, bit će upisna 4 odjeljenja, odnosno 120 učenika. Više rasprave vođeno o Planu upisa učenika u Mješovitu srednju školu, kojim je bio predviđen isti broj odjeljenja sa istim strukturama kao i prethodne školske godine, s tim što nije planiran upis učenika u elekto i mašinsku tehničku školu zbog velikog broja svršenih učenika ove struke koji se trenutno nalaze na evidenciji Biroa za zapošljavanje. Nakon diskusije, vijećnici su prihvatili stav da se ponuđeni Plan upisa u tu školu proširi za još četiri odjeljenja i to: dva odjeljenja četverogodišnje škole (IV stepen): po pola odjeljenja mašinski tehničar za CNC mašine i mašinski tehničar – programer u okviru jednog odjeljenja mašinske struke, drugo odjeljenje elektrotehničar energetike; dva odjeljenja trogodišnje škole

(III stepen): po pola odjeljenja zidar – tesar i po pola odjeljenja bravar – alatničar. Obje škole najavile su da će u narednom periodu krenuti u promotivne aktivnosti, kako bi se učenicima i roditeljima prezentirali potencijali i prednosti ponuđenih škola.

15. 3. 2013.

“KOVAN” M. I. IZ GRAČANICE: FABRIKA PELETA U OLOVU

Riječ je proizvodnom pogonu u Olovskim Lukama u kojem je ovaj renomirani proizvođač eko-kotlova započeo proizvodnju drvenih peleta koje će se koristiti kao ekološko gorivo u tim kotlovima. Time je zaokružio svoj proizvodni program eko zagrijavanja stambenog i poslovnog prostora izlazeći na tržište i sa ekološkim gorivom pod povoljnijim uslovima za kupce svojih eko peći. Radi se o dobro osmišljenom poslovnom potezu i pravoj lokaciji za proizvodnju tog goriva. Olovo raspolaže velikim šumskim kompleksima i velikim količinama drvne mase kao osnovne sirovine za proizvodnju peleta. U pogonu je na samom startu zaposlenje dobilo 20 radnika, a očekuje se i prijem novih.

28. 3. 2013.

ŠESTA SJEDNICA OPĆINSKOG VIJEĆA: NAJVIŠE RASPRAVE OKO IMENOVANJA ČLANOVA NADZORNIH ODBORA JAVNIH PREDUZEĆA „KOMUS“ I „VODOVOD I KANALIZACIJA“

Takve tačke, uobičajeno pobuđuju pažnju vijećnika, iako je njihov zadatak da samo formalizuju ono što je već dogovoreno u okviru stranačke trgovine oko takozvane vijećničke većine, u ovom slučaju između SDP i Bosanske patriotske stranke. Više vremena vijećnici su potrošili oko tih imena nego oko Izvještaja o izvršenju budžeta Općine Gračanica za 2012.

godinu, koja je, prema riječima općinskog načelnika završena bez budžetskog deficita. Budžet je ostvaren u iznosu od 12.103.092 KM, što je bilo dovoljno za plaće lokalne uprave, finansiranje takozvanih vanjskih korisnika, materijalne troškove, servisiranje dugova po kreditima, realizaciju većine planiranih projekata itd. Završetak budžetske godine bez deficita omogućit će mnoge pogodnosti, kao što je npr. kandidovanje projekata prema međunarodnim fondovima, vladama i drugim investicijama. U nastavku sjednice vijećnici su dali saglasnost na statute mjesnih zajednica Gornja Lohinja i Lendići i uz nekoliko sugestija usvojeni izvještaje o radu javnih ustanova Dječije obdanište „Naša djeca“ Gračanica, Centar za socijalni rad Gračanica i Bosanski kulturni centar Gračanica. (Pres općine Gračanica)

8. 4. 2013.

UMRO ABDULAZIZ AHMEDBEGOVIĆ, JEDAN OD POSLJEDNIH MLADIH MUSLIMANA U BOSNI I HERCEGOVINI

Rođen je 1926. godine u Sokolu, u uglednoj porodici Ahmedbegovića, koja po porodičnom predanju vuče porijeklo iz Anadolije. Završio je nižu Behrambegovu medresu u Tuzli i višu Gazi Husrev-begovu medresu u Sarajevu, kasnije pohađao orijentalistiku, ali državnu službu nikada nije mogao dobiti – iz političkih razloga. Sredinom 1943. godine povezuje se sa organizacijom Mladih muslimana na području Srebrenika i Gradačca, u proljeće 1945. stupa u jednu partizansku jedinicu i sa njom dočekuje kraj rata. Bilo je to političko opredjeljenje većeg broja članova organizacije Mladih muslimana koji su u partizanskom pokretu prepoznavali najbolje rješenje budućeg statusa Bosne i Bošnjaka u

njoj. Po završetku rata, međutim, počela je neka druga priča i nepodnošljivo rušenje ideala - prvi udari na slobodnu misao, na vjeru, na tradiciju, na imetak. Potom hapšenja, torture, zatvor. Bit će upamćen kao ugledan građanin svog rodnog Sokola i općine Gračanica, vrijedan aktivista mjesne zajednice, uvažen kao komšija, vjernik, svjetski putnik, proputovao 26 zemalja svijeta, dugogodišnji predsjednik Medžlisa Islamske zajednice Gračanica, mladi musliman u mladosti, mladi musliman-u zreloom dobu, napredni poljoprivredni proizvođač nekad-i sve do duboke starosti. Ukopan je 9. 4. 2013. u mjesnom groblju u Sokolu.

23. 4. 2013.

SAJAM „GRAPOS-EXPO GRAČANICA, ČETVRTI PUT

I pored privredne krize i recesije, zahvaljujući podršci općine, Vlade TK i Udruženja gračaničkih privrednika, ovaj sajam

postaje već prepoznatljiv na spisku sajamskih manifestacija ne samo u BiH, već i regionu i više „ne treba da brine za svoju budućnost“. Ove godine okupio je (prema službenim podacima) 270 izlagača, među kojima po nekoliko iz Njemačke, Austrije i Francuske, koja je ove godine „Zemlja partner“ Sajma. Zapaženo je učešće više uglednih firmi sa Tuzlanskog kantona i iz Bosne i Hercegovine, ali i izostanak nekih vodećih firmi iz Gračanice. Tokom četiri dana sajma za posjetioce je organizovano nekoliko konferencija i okruglih stolova sa različitim spektrom tema: od unapređenja poslovanja malih i srednjih preduzeća do uvođenja savremenih agrotehničkih i ekonomskih mjera u agraru. Prema podacima organizatora, firme „Boms expo“, Sajam je ove godine posjetilo 17.000 posjetilaca, dok su neki mediji bili mnogo oprezniji kod izvještavanja o posjećenosti